



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 6

Yangia anidakangma :



Tir Yimyim



tir_yimyim



tir yimyim

TAPAK 8

Tripura-i ozüing alema ganja tsünüba
anema drone tem amshitsü

Russell international
cricket asaya nungi anisüngzüker

VOL. XXII ISSUE NO. 279 (ADOK 279)

DIMAPUR

YANGTEPNÜ (THURSDAY)

CHITENI (JULY) 24, 2025

₹ 5.00

Tamil Nadu nung mapa inyaker tenüing agütsütsü ayongzüker

Dimapur, Chiteni/July 23 (TYO): Angati health and medical facilities, tanur indang education, chiyongtsü, affordable stay aser asü-amaba aser mapa inyakba tesem nung lendong ajuruba mapang senotsü teyari agütsütsü densema Tamil Nadu sorkari migrant workers nem teyari agütsütsü mechi Department of Labour, Government of Tamil Nadu ajanga Tamil Nadu nung migrant workers indang registration maparen tajungba inyaktsü telemtetba agiogo.

Iba dak sendakba nung Naga Christian Fellowship Chennai indang Pastor aser State-Level Inter-State Migrant (ISM) Workers Advisory Committee, Government of Tamil Nadu züngsem Wapangtoshi-i construction, catering establishments, factories, hospitality, retail, self-

employment amala unorganized sector nung mapa inyaktsü asoshi Tamil Nadu-i arur ajunga dang <https://labour.tn.gov.in/ism> nung register asütsü ayongzüker.

Northeast India aser talisa Assam, Manipur, Nagaland, Mizoram, Meghalaya aser Tripura nungi migrant workers jenti arua Tamil Nadu indang unorganized sector nung mapa inyaker saka tang tashi register masü lir, ta pai ashi.

Koda masü timtem mapang khuret ya timba community groups aser züngsem temi abener.

Tamil Nadu nung mapa inyaktsü asoshi Northeast region nungi arurtem kumzüka ayutsü aser yaritsü atema state sorkar, civil society aser jangra aliba nisung tem nungi yariteptsü ayongzüker, ta Wapangtoshi-isa ashi.

Kohima nung taxi ka rakzük-raktemeri bener ao

Kohima, Chiteni/July 23 (TYO): Kohima district kübok Viswema aser Kidima tsüngta Viswema village tsünglanglen July 21, 2025 nikongdang 4:00-4:30 meta local taxi ka (registration number NL01T-A0183) prangbong agi tuitir rakzüka bener ao.

Iba gari indang driver ya Naga nunger masü aser pai iba tatalokba ya osangbener dang Bodhbarnü ang ashi. Pai ashiba agi pa indang taxi ya hire süa Viswema tsünglanglen Zero Point Chakhabama nung aliba ayong kati bener ao aser mejangjaba nisung asem nungi kati pa tekong nung soiter gari nungi atsüzüka yok.

Mejangjaba nisung asem rongnung kati gari atemlok, aser kati pa dak prangbong ka agi tuitir pa gari nung aludaktsü aser taxi ya bener ajen. Taxi kibur ya local nisung lir.

Gari rakzüker aortem ya arishi küm 30 shi asütsü aser parnoki Zero Point Chakhabama tsütsüü BSF Camp leni bener ao, kechiaser iba anogo lenmang shibanger liasü. Kasa mapang pa indang senpong nung sen 4,000 shi sepa aliba rakzük. Iba sülen pa lenmang nung jaja aoba mapang an-chanu bena aliba gari kati anenja yangji mener Kohima-i shilang, ta pai ashi.

Kasa anogo North Police Station, Kohima nung FIR benoka lir aser bushisingdang tenzüker.

Kasa mapang All Nagaland Taxi Association (ANTA) indang

assistant treasurer Victor Rutsa-ia iba tatalokba indang süoki ia bilemba lemsatepa liasü.

ANTA-i police den osang agiteptar ta pai ashi aser taxi NL01T-A0183 senzüa angurtemi ANTA office mesüra police nem osang agütsütsü ayongzüker. Pai aibelener tekeraba nung pua tapet ozüing agi merenshitsü ayongzüker.

ANTA HQ Kohima indang tir Dziesevituo Solo-ia association tenüing nung iba tatalokba aitsü aser iba ama prangbong amshiba aser rakzük-raktemba yimya tatok magütsütsü ta ashi.

Paisa ozüing amshirtem dang tekeratiba nung aibelener aputsü aser tapet temerenshi agütsütsü ayongzüka liasü.

Aibelener apuba nung sorkar agency den ANTA-i akokba lenmang ajak nung yariteptsü aser ochi obendang asoshi tasü ita aser indang-indanga ochi nung nokdaktsü, ta paisa ashi.

NH-29 lenmang junga meyangluba atema CM Rio-i NHIDCL aitsü

Dimapur, Chiteni/July 23 (TYO): National Highways & Infrastructure Development Corporation Limited (NHIDCL) ajanga tang teyangludak aliba National Highway-29 (NH-29) nung kangasa temulung masüba indang Nagaland Chief Minister Dr. Neiphiu Rio-i Bodhbarnü lemsatepa liasü.

Chümoukedima nung Nagaland Police mess facilities

Yimjung aser terenlok asoshi civil-police amalitep tongtipang: CM



Dimapur, Chiteni/July 23 (TYO): Tanü Nagaland Chief Minister Dr. Neiphiu Rio-i police mapa inyakba ya sorkar tashi ka indang inyakyim kisüing masü saka kati ka akumtsüboa amalitep akaba nung tesendaktep yangerba lir ta ashi.

Chümoukedima Police Complex nung Nagaland Police NGOs Mess & Nagaland Police Officer's Central Mess semzüksüba sentong nung jembidang, law enforcement aser administration ya sorkar indang tongtired lir, ta Rio-i ashi

aser yimjung aser terenlok asoshi civil-police tsüngta amalitep akatsü tongtipang ta ashi.

Police temi ajak den jungtepa aser atsü-anem katempa meinyaktsüla saka yimya shidak amshia ochi aser indang-indanga tenzüksüla aser nai inyakba ajanga nüburtemi nüdak tamang katettsüsa alitsüla, ta pai ashi.

Police personnel aser pei kibong temi talisa talitsü ki aser mapa inyakba nung timtem jenti ajuruba meteta lir, anungji state

sorkari maneni akokba lenmang nung teyari mapatem tajungba nung maneni inyaktsü, ta Chief Minister Dr. Rio-i ashi.

Police tem tashi taitba aser tajungba kumdaktsütsü mechi sorkari police nem technology tasenba, professional trainings aser ki o jen tasenba agütsütsü temulungtetba nung lir ta pai ashi.

Tanü tensa nung nüngdakba ama Officers alitsü ki tasenba ya yanglu, kong Officer's Mess indang buildings nung Officers 24 aser kibong asemstsü aser NGO's Mess nung Non-Gazetted Officers 64 asemstsü, ta Deputy Chief Minister in-charge of Home and Border Affairs, Y. Patton-i kasa sentong nung ashi.

Ibe ki o jen ajanga bendanga agütsür tasü ita state tenzüksü police personnel nem anisüngzüka alitsü tesem peria agütsütsü sorkari bilema aliba sayur, ta paisa ashi.

Dimapur, Chümoukedima aser Niuland nung saksalema alitsü tuyur

Dimapur, Chiteni/July 23 (TYO): Dimapur, Chümoukedima aser Niuland indang district administration temi nübur ajunga dang Assam sorkari eviction drive agüba sülen talidak ki makai prokshia alirtem Nagaland alema aittsü merangtsü akok, ta tekumdagtsü metetdaktsüogo.

Deputy Commissioner, Dimapur, Dr. Tinojongshi Chang-i nüburtem dang saksalema alitsü aser illegal immigrants tem district telungi ait-mait meita repranga alitsü metetdaktsü aser teti senzusempongba dang nungi tali nisung senzüba metetra District Administration aser Police nem osang agütsütsü shiogo.

Chümoukedima district administration ajanga Medziphema, Dhansiripar aser

Seithekema sub-divisions indang administrative officers aser Chümoukedima aser Medziphema Town Councils indang Executive Officers tem dang pei aliba jurisdictions nung Assam nungi illegal immigrants aittsü amai aliba nungi kumzüksü asoshi nüngdakba mera agitsü totuyuba agütsüogo.

Village councils aser town councils ajunga nem tang aliba tensa indang angatetdaktsütsüla aser nisung kija mesüra telok temelaba makai district telungi aitba metetra district ketdangsür nem yakta osang agütsütsü metetdaktsü.

Niuland district administration-ia Assam sorkari illegal immigrants anema eviction drive tang tagidak aliba mechi illegal immigrants tem aitba saksalema meita atatsü yimtsüng

ajunga dang metetdaktsü.

Assam den arütsa alilen akhi yimya ama mesüi nisungtem senzusempongba lazükra, tekeraba nung district administration nem metetdakjang, ta Deputy Commissioner, Niuland ajanga sangdong nung ashi.

Assam nung evetion drives agiba sülen illegal immigrants tem state telungi aittsü akok ta tekumdagtsü prokshiba mapang Niuland district administration, Police, CRPF aser yimtsüng ketdangsür temi yasüng gari 200 dak tema soita meypa yokogo, ta ashir.

Item gari nungya evicted illegal immigrants tem mener Niuland district telungi aittsü meranga liasü, ta Niuland DC ajanga social media sangdong ka nung ashi.

semzüksüba sülen osangbener den jembidang, mapa ya scientific yimya nung meinyak aser item mapa inyakba contractors dak temulung Machir, ta Rio-i ashi.

Tang project tia nung state sorkar kanga mepelar ta pai ashi.

Rio-isa tang aruya aliba Independence Day anogomung sülen iba tebilemstsü ya Delhi nung Ministry den indang-

indanga bener oa jembitsü sentong lir ta metetdaktsü.

Süoki ia jembishinü akatsü aser shidak inyaktsü aser aibelen metongshitsü atema tapet documents aser osangtem bener aotsü ta pai ashi.

Kasa mapang Assam nung illegal immigrants anema eviction drive tang tagidak aliba aser iba inyakyim ajanga arütsü alema illegal immigrants tem aittsü akok ta bilemba indang

tasüngdangba langzüdang, state sorkari iba tensa kanga junga meita reprangtar, ta Deputy Chief Minister Y Patton-i ashi.

Pai iba tebilemstsü ya Commissioner of Police aser Director General of Police den lemsatepa jembioogo ta ashi.

Kanga junga mittsü aser azüoktsü atema Assam-Nagaland arütsülen tongtipang tesemtemi security personnel tali yoksemtsü ta paisa ashi.

Health Worker Guide, Brief Advice Protocol aser TFV Guideline amenokogo



Dimapur, Chiteni/July 23 (TYO): State nung public health inyakyim tejakdango bener aotsü atema tongtibang jenjang ka agia Health Worker Guide (HWG), Brief Advice Protocol, and Tobacco-Free Village (TFV) Guidelines July 23 nü formally amenokogo.

Directorate of Health & Family Welfare, Government of Nagaland aser National Tobacco Control Programme (NTCP) kübok Vital Strategies na longjemer Strengthening Tobacco Control and Tobacco Cessation dak sendakba nung State-Level Workshop ka agiba mapang iba Guideline ya amenoka liasü.

Iba national resources (HWG & TFV) ya NTCP, Ministry of Health and Family Welfare (MoHFW), Government of India-i yangluba lir. Vital Strategies, New Delhi-i technical teyari agüja Nagaland sorkari Advice Protocol (moko

amshiba indang asündangtsü, toktsütsü atema tajungshiba aser Refer to Quitline/ Tobacco Cessation Center) ka yangluogo.

Iba guideline ya Secretary, Health & Family Welfare, Government of Nagaland S. Tainiu-i, Dr. Mereninla Senlem, Principal Director, Health & Family Welfare, aser Dr. Avile Zao, Mission Director, NHM aser department nungi ketdangsürtem matsüngdang officially sayaja liasü.

Yimya melenshitsü, cessation advice agütsütsü aser moko nungi pila aliba environment tem nongita yaritsü atema frontline health workers aser community institution tem dang len sayutsü nükjidong nung iba ya tenzüko.

Vital Strategies' den kümtem tsüngda longjemer inyakba ajanga parnoki technical expertise, capacity building, aser policy support ajanga state

nongita arudar.

Iba workshop nung district-level NTCP team tem aser stakeholder tem, National Programme for Prevention and Control of Non-Communicable Diseases (NP-NCD), National Mental Health Programme (NMHP), National Tuberculosis Elimination Programme (NTEP), aser Department of School Education nungeri shilem agia liasü.

Sentong nungsa district level nung tobacco control programme maneni nongita yariba atema Dr. O. Daisy Ovung, Senior Dental Surgeon & DNO Tuensang nem Best District Nodal Officer naroküm agütsü, Imkumla Aier nem Best Psychologist (Dimapur), Medongunuo Pienyu nem Best Social Worker (Dimapur), aser Nukshiwati Longchar nem Best District Consultant (Mokokchung) naroküm agüja liasü.

Kohima DC-i gari senzügenpong indang metetdaksü

Dimapur, Chiteni/July 23 (TYO): Chainages (KM 175.100 & KM 175.350. KMC jaba bendendak tejenba) nung National Highway-29 tamajungba küma aoba dak sendakba nung nüburtem kümzüka toktsütsü atema iba National Highway kübok lenmang mejungi aliba tesem nung gari senzügenpongtsü atema tenokdangba kar agütsüogo.

1. LMVs (Non-Transport) tem anepdang 6 ako nungi nikongtsütsü 6 ako tashi senzütsü melatsü, saka tsüngsang junga alitsüla. Tsüngsang mejungra

ketdangsürtemi tenokdangba agütsütsü.

2. National Highway nung lenmang mejungi aliba tesemtem nung aonung gari senzütsü memelatsü.

3. Water tankersaser para-military garitem densema gari tulu aser compact/mid-size pick-up gari aser commercial passenger garitem khenyongi senzütsü memelatsü.

Kasa mapang nung teküboklen agüja aliba lenmangtem amshitsü tetutyuba agütsüogo.

1. Kohima nungi Dimapur-i aoba garitem: LMV tem atema

Jotsoma Bypass lenmang.

2. Dimapur nungi Kohima-i aoba garitem: Peducha Bridge-Tsiesema (10 Mile Road); LMV & HMV tem ajak.

3. Para-military garitem ajak Peducha Bridge-Tsiesema (10 Mile) lenmang nung dang senzütsü.

Nüburtem kümzüka toktsütsü aser lenmang kecha tetsükdaksü makai yanglushitsü atema iba tetuyuba ya agütsüogo. Iba tetuyuba sülen manidakertem temzüng ozüng dak ajemdaker tapet temerenshi agütsütsü ta kasa sangdong ajanga metetdaksüogo.

Kohima nung Mid-Day Meal Cook tem training agi

Kohima, Chiteni/July 23 (TYO): July 22 aser 23 nü ta Mid-Day Meal cook tem atema anogo ana asoshi capacity building program ka Kohima nung DEO aser SDEO office nung agiogo.

Iba sentong ya Department of School Education (DoSE) tawabangba kübok ayongzü, koba nutrition, balanced diets, food safety, aser hygiene dak sendakba nung Mid-Day Meal cook tem nem tangazükba agütsütsü nükjidong nung ayongzüka agiogo.

Sentong nung Commissioner

& Secretary, Principal Director, Additional Director, Joint Director, aser Deputy Director tem densema Department of School Education nungi ketdangsürtemi shilem agiba ajanga kanga meraketdakja liasü aser iba ajanga Mid-Day Meal Scheme takok asoshi department bendanga agütsür aliba sayur.

Chef Supong-i, nutrition, balanced meals koda tongtibang, food safety standards, aser merekmeju inyakyim dak sendakba nung tangazükba

agütsü. Pai tasa balala sayuba den cook tem nem shilem agidakja sayuba ajanga training nung shilem agirtem kanga ajangzüko.

Ajak senteper Kohima district kübok block pezü nung sorkar school 122 nungi cook 200 shi-iba training sentong nung shilem agia liasü. School tanurtem nem chiyongtsü tajung merekmera renemer agütsütsü atema cook tem nem tenüngdakba skill aser shisatsü agütsütsü nükjidong nung iba training sentong ya ayongzüka agiogo.

East Dimapur Town Council-i kümküma alitsü metetdaksü

Dimapur, Chiteni/July 23 (Agencies): East Dimapur Town Council office sangdong ka ajanga parnok kübok aliba lispourtem dang, Assam nung tang ozüng alema ali atsünger alirtem mintokba mapang item nisungtem ya East Dimapur jila kübok tesem balala nung arua jenoktsü merangtsü ana nung lir anungji ajak kümküma alitsü metetdaksüogo. Iba ya asen lokti kümzüka toktsütsü, security aser lokti ajangzüksü atema kanga tongtibang lir, ta kasa sangdong ajanga metetdaksü.

Office ajangsa lisopur aser ali kiburtem dang pei kiyong nung mejangjaba nisungtem senzügenpongba mesüra anenzükba meita atatsü metetdaksüogo. Tejenokdak aser mapa magütsü tsüngda aayangertem, ki para bushirtem

indang maitsü aser temzüng ozüng kübok parnok jenjang tama jangjatsü metetdaksüogo.

Maneni temulung malemstsüa inyakyim, lokti adenshiba mesüra ozüng alema arurtem ama bilemra ketdangsürtem nem osang agütsütsü metetdaksüogo.

Maneni Office-i, kija aser ali kiburtem shirnoki metetsümonga ozüng alema arurtem jenokdaksüra ibaji parnok khuret asütsü aser temzüng ozüng dak ajemdaker jenjang tapet agütsü ta tekümdangtsü metetdaksüogo.

Iba dak sendakba nung ajaki teka amteper inyaka temzüng ozüng alema inyaksangshiba mapren balala nokdangtsü, aser ajak tekümsükba kübok toktsütsü East Dimapur Town Council office-isa ayongzüko.

Kiphire nung mi lendong atalok



Kiphire nung mi lendong agi kongshir aliba kibongtem nem teyari agütsüogo.

Dimapur, Chiteni/July 23 (TYO): July 23 anepdang Kiphire nung Fire Station nungi KM 3 pilar Kipongya Ward, Zone 6, Kisingki nung mi tulu ka adoka liasü.

Osang ajanga ashiba agi, anepdang 5:40 meta mi adokba osang ka angazüka liasü. Osang angazükba sülen mi temseptsü atema Water Tankers (WTP) ana den nübu peria yoka liasü. Ghonda ka dak tema inyakba sülen mi ya temsepteta liasü.

Mi lendong nung takdang trok aser kitchen 3 ajunga

rongtoka liasü. Iba temeket nung aliba ki 7 nungi 10 shi mibenertemi mapang shitak nung jenjang agiba ajanga kümzüktetogo. Lendongnungsa nisung ana terara yiru aser temang anepalutsü atema District Hospital-i yoka liasü. Lenmang ajanga tesendaktep majungba den len talang süaka fire station-i takaratiba nung telangzüba agüja liasü.

WPT aser nübu peria yokba ajanga mi kanga takok ngua temseptet aser teraksatsüba tulu adoktsü aliba nungi jenbogo.

Career Orientation indang metetdaksü

Dimapur, Chiteni/July 23 (TYO): Administration Authority Kiphire-i sangdong ka ajanga, Career Orientation & Job Opportunity Session ka August 8 nü Zisaji Presidency College (ZPC) Auditorium, Kiphire nung 11 ako nungi tenzüka 3 ako tashi agütsü ta metetdaksüogo.

Iba session ya Nagaland Skill & Entrepreneurship Development Mission (NSEDMD) kübok Eagle Crest Training Academy & Consultancy den longjemer ayongzüka agütsü.

Iba sentong ya hospitality sector nung mapa inyaksü atema maongka aliba indang tangazükba agütsütsü aser lanurtem skill-based training aser placement support ajanga

parnok career yanglutsü atema lenmang sayutsü nükjidong nung ayongzüko.

Training mapang hospitality career dak sendakba nung orientation, training aser placement program tem metetpelaba, Eagle Crest aser NSEDMD nungi ketdangsürtem den sensaksemba sentongtem densema lir aser taruba batch tem atema züngoksemtsü asoshi maongkatema agütsütsü.

Kaketshirtem nem mapa angutsü atema skill tem agütsütsü aser parnok nem career indang tangazükba agütsütsü nükjidong nung iba sentong ayongzüko. Tejangrartem ajak iba sentong nung dena maongka agütsüba agütsü metetdaksüogo.



July 23, 2025 nü New Delhi nung Lok Sabha Speaker Om Birla, Rajya Sabha Deputy Chairman Harivansh Narayan Singh, Congress Tir Mallikarjun Kharge, party MP Pramod Tiwari aser tangartemi asür, Bal Gangadhar Tilak asoba anogomong nung asür nem akhüm agütsüba sülen tangokba noksa nung angur.

Linük tatong Tir election agitsü atema EC-i maparen tenzükogo

New Delhi, July 23 (Agencies): Linük tatong Tir Jagdeep Dhankhar-i ajungbena tatong Tir menden nungi anenba sülen anogo ana lir Bodhbarnü Election Commission-i pa melen tatong Tir election shimtsü atema maparen tenzükogo.

Election Commission-i Parliament House anaprongla nungi MP tem densema aliba electoral college tentet tenzükogo. Parliament House anaprongla nung election ajanga shimba MP tem aser Tiri shimba MP temi vote agütsütsü.

Election Commission-isa iba election atema returning officer aser assistant returning officers-a shimadokogo.

EC-i, "Election atema inyakyim ajak renemba sülen India tatong Tir election agitsü

atema kobi melii sangdong agütsütsü," ta metetdaksü.

Hombarnü Dhankhar-i pa temang manemi dang aliba kuli metetdakja tatong tir menden nungi anen. Pa kümsük 2027 küm August 10 anogo tashi liasü.

Mongolbarnü Union home ministry-i official süa Jagdeep Dhankhar-i tatong Tir menden nungi anenba metetdaksü.

Linük temzüng nung Arrla 68 Clause 2 kübok tatong Tir ka süadokba, menden nungi anenba mesüra agienba mesüra tanga kuli balala nung ajemdaker anenba sülen menden tazüng atema tekeraba nung election agitsü shia lir.

Tatong Tiriji shiba shimdir shimaka pa/laji pai office mapa agizükba anogo nungi tenzuka kümsük pongu atema shimtsü.

Linük tatong Tir menden

atema arrshi küm tajemba agia küm 35 asütsüla, India senso ka asütsüla aser Rajya Sabha züngsem ka ama tetemsü asütsüla.

Tang Lok Sabha nung menden 543 nungi menden ka (West Bengal kübok Basirhat) tazüng lir aser züngsem 245 aliba Rajya Sabha nungbo menden pongu tazüng lir.

Tang Rajya Sabha nung menden tazüng pongu nungjagi pezübo Jammu & Kashmir nungi lir aser tanünga menden kaji Punjab nungi lir. Punjab nung AAP lenir Sanjeev Arora-i taoba ita by state assembly election nung takok anguba sülen MP menden azüngtetja liasü.

Tang House ana nung züngsem 786 lir, anungji tatong Tir election nung takok angutsü atema vote tajemba agia 394 bosa nüngdaker.

Tang Lok Sabha nung BJP-i aniba NDA züngsem 293 lir aser Rajya Sabha nunga NDA züngsem aser parnok pusemertem ajak senteper 129 lir, anuungji tatong Tir election nung NDA-i ayongayonga takok angutsüsa jenjang ka nung lir.

Parliament House anaprongla nung opposition-i longkak ait

New Delhi, Chiteni/July 23 (Agencies): Bodhbarnüa Parliament House anaprongla nung Opposition züngsemtemi longkak aitba ajanga senden thinenogo.

Tzüngluruwa mongpu Parliament tenzükba sülen anogo asemnübuba senden junga magiteti arudar. Opposition MP temi tangsa Operation Sindoor onük nung o lemteptsü aser Bihar nung electoral roll atema agiba Special Intensive Revision (SIR) atema jembitsüla, ta akhanger.

Lok Sabha nung chair Krishna Prasad Tenneti-i longkak aiterem dang tongtibang bill benoktsü atema süngjemang ta mepishi, ajisüaka opposition-i maneni longkak aitba ajanga senden thinen liasü. Rajya Sabha nunga

senden tenzükba sülen opposition-i longkak aitba ajanga anüngdang 12:00 ako tashi senden thinen. Tanaben nikongdang 2:00 ako nung senden tenzük, ajjisüaka opposition-i maneni longkak aitba ajanga Brihostibar tashi senden thinen.

July 29 nü Parliament nung "Operation Sindoor" onük nung o lemteptsü atema Lok Sabha aser Rajya Sabha naprongla nung mapang peria lezmüksütsü.

Bodhbarnü Business Advisory Committee (BAC) senden amenba mapang nung Operation Sindoor atema o lemteptsü asoshi mapang peria agütsütsü lemtet. Lok Sabha nung iba onük nung o lemteptsü atema ghonda 16 lezmüksüo aser Rajya Sabha nunga iba onük nung o lemteptsü atema ghonda 9 lezmüksüo.

KOHIMA AOR PENSIONER TELUNGJEM TASEMBUBA INTI SENDEN



KOHIMA AOR
PENSIONER
TELUNGJEM

Arangshi Kilem
ESTD: 2022

OMEN: Teintet Taküm Chiyungtsü & Tamang

Anogo : July 25, 2025

Mapang : Anüngdang 11.00 ako

Tesem : KABA Lerie Fellowship Tenla Ki, Kohima

KETDANGPURTEM:

Tir : Dr. Watijungshi Jamir

Tatong Tir : Dr. Temsü Jamir

Tongti Zülur : Wb. Limawati Longchar

Repsem Zülur : Wb. N. Wati Atsongchanger

Kimen : Er. Lanuakum Ozüküm

SENTONG TARENSEN

Menden - Ketdangpurtem

Asür Bilemtetba : Wb. N. Wati Atsongchanger
Repsem Zülur

Lai Zünger Sarasademtsü : Rev. A. Chuba Jamir

Menden Okila : Dr. Watijungshi Jamir, Tir KAPT

Onük : **Tain küma aodang koda junga chiyungtsü**

(How to eat well as you age)

Tejembir : Wt. Imsutula Jamir,
Dietician, CIHSR Dimapur

Temeja Ken : Wb. Sanen Amer

Tsüngrem O : Teintet Tamang

Tejembir : Rev. Prof. Mar Pongen
General Secretary NBCC

Osangtem Agitsü a) Tongti Zülur osang

b) Senotsü osang

c) Nungtet Luden osang

O Lemtep Mapang

Menden Melentepba

Mapang : Wt. Aolemla Jamir,
Nungtet Luden Tayonger

Melepszüng O : Dr. Temsü Jamir

Tatem Sarasadem : Dr. Nokrenchila

CHIYUNGBA MAPANG

TEMETETTSÜ

- 1) Iba sentong nung KAPT züngsem ajak arua adentsü pelashishia jaoker.
- 2) Iba senden nung KAPT maparen balala nung amshitsü atema temulunger tenla bendentsü anungji züngsem ajaki mulungsoa tenla tajung bener arutsü mepishir.
- 3) Züngsem kari züngsem saru (Registration Rs. 500/- & kümshi saru Rs. 200/-) magütsüi lira iba sendeni arudang agütsütsü metetdaksür.
- 4) Onük jembir shiai minute 25 agitsü mepishir.
- 5) Iba Inti Sentong takok aser temoatsü nung agitettsü ajaki sarasadema atadi.

Bihar nung voters lakh 1 dak tema mali: EC

New Delhi, July 23 (Agencies): Bodhbarnü Election Commission-i, tang tashi nung Bihar nung Special Intensive Revision (SIR) exercise kübok voters shilem 98.01 ayimjemogo aser voters lakh 20 bo süadokba jangjaogo, ta metetdaksü.

Election Commission of India-isa, Bihar nung voters lakh 28 bo teti atema bendangleni/tangaleni oadokogo, voters lakh 7 bo tesem ka dak tali nung tenüng agüja lir, aser voters lakh 1 dak temabo mali, ta metetdaksü.

Tang tashi nung Election Commission-i Enumeration Forms crore 7.17 digitize süogo aser state nung voters shilem 90.89 jangjaogo, ajisüaka tang tashi form lakh 15 mangu.

Bihar nungi tangaleni khenpiga atema oa alirtem aser tangaleni register süa malir voters-i online ajanga <https://electors.eci.gov.in> nung form agütsütsü akok, ECINet mobile app ajanga mesüra printed form ajanga agütsütsü akok. Printed form ji kibong züngsem kar ajanga mesüra

Whatsapp ajanga Booth Level Officer (BLO) nem agütsütsü akok, ta Election Commission-isa metetdaksü.

Enumeration Forms agütsürtemji Draft Electoral Roll nung züngoktsü aser SIR mezüngbuba shilem tembangba anogo- August 1 nü sangdongtsü, ta parnoki metetdaksü.

Draft Roll nung tashishiba kar danga lira voters mesüra yimtenren party temi September 1 anogo tashi nung ERO mesüra AERO nem tashishiba agütsütsü akok.



TIR YIMYIM YIMOBILEM (EDITORIAL)

DIMAPUR

YANGTEPNÜ

CHITENI 24, 2025

Shitakba Medical Doctor

Medical doctor ya alima nung Tsüngrem melena taneptsür mapa inyaktertem lir, anungji parnok mapa aser akhümji tanga mapa inyaktertem dang nungi tuluba aser temaba lir. Aji oda, aiben nisung ka taküm o tasü na tsüngda bendangtsüsa doctor ket nung tashi amshitsüsa adoker, anungji iba ama nisung dakji ochi mulungjang aser temeim teka dena alitsü nüngdaker. Tanü, asenok ajak tia majung, Nagaland nung iba ama shitakba teindang aser temeim mulungjang adenba medical doctor agi anüngba indang, tangari masü, Nagaland Medical Council-i metetdaksübaji peisasa pei tai nangzüka melenshitsü merangba mapa ka asütsü. Atangji, Nagaland nungbo government-i inyakba maparen aika nung ozünga mali amai pei inyaknüsü inyaker. Ibayongji, terenlok mapa inyakba mapatem aika kodanga merenemer aser renemaka mapa aika shitak jungjunga renemba mapatembo malitsü. Kasaji, Nagaland nung government ajanga nübortem asoshi taneptsü mapa inyaksü asoshi akümba medical department kübok lapokba mozü kitem aser mozü ayokdak inyaktertemi taila tazüngba degree bener arua shiranger anepaluba aser mozü ayokba otsütemji angadanga kanga tejashitsüka lir. Item jagi nisung aika pei arishi matongdangyongi südaktsüogo aser mozü mashimashi agütsüba dang masü saka talila agütsüba ajanga senotsü talila endokdaksüba dang masü saka temang nung tanga tashidak dena adokdaksür alitsü. Ibaji dang masü saka lendong kaji tangalen nungi taila doctor ser nung temulungjang, tezüng aser tokolok nung timtem aliba aneptsür doctor mongin amai aruagi mozü kidang monga shirangertem temang tendangdakja anepaludaksüba mapatem asütsü. Item jagibo shiranger aika ket nungi sen dalang agir tepseta yutsüogo ta bilemdi. Item tejashitsü aser tebilemstütem dakji alaka, ano, nübortem nem takoksa tulu bener arutsübaji government mozü kidang inyaktertem doctor-temi pei meyong private mozü ki lapoka inyakba ya asütsü. Ano, government doctor aika pei meyong private mozü ki melapokaka, tangar private mozü kidang inyakba ajanga government mozü ki majunger. Iba yabo Tsüngremia mepelai repranga alitsü südi. Medical doctor-tem yabo tazüngdangyongi government-i yaria züngdaksür aser züngzüker külen kodang government mozü kidang inyaksü asoshi shimdir, pa mesüra laji private mozü kidang inyaksü memelar. Aji oda, private mozü kidang meinyaksü asoshi ita sen tajung den ano 20% bendenloker government doctor nembo Non Practicing Allowance ta ser sen aika agütsür. Ajisüaka, government medical doctor aikati iba allowance senjia agir aser pei nem lemozüksüba government mozü kidangbo anogo nung mapang tatsüka inyakerbo pei private mozü kidang oa inyaker. Aji oda, government doctor aikati pei ita sen tajung den allowance chia inyaksü lemozüksüba government mozü kidangi arur shirangertembo mashi ka dang repranger aser pei private mozü kidangi arutsü ajungshir. Ibayongji, shirangertema junga reprangdaksünüba agi government doctor bushia private mozü kidang anepaludaksür. Iba amaji taneptsü agütsütsü inyaker masü saka tashidak agi sen melentsü bilema inyaker asünungji, Doctor-tem aikati Kohima aser Dimapur ana dak alaka tanga Primary aser Community Health Center nung inyaksü yokaka maor. Ano, Kohima aser Dimapur na dak alaka District Hospital nunga tanga private mozü ki malidak district nungbo doctor aikati meinyakner. Ibayongji, Nagaland nung mozü ki aika nung doctor mali aser aliyonga Specialist-bo mali doctor ka kisüngi mozü kidang shiranger anepalur masü saka ki anüker amai tokja aliba angutsü. Iba ama taneptsü indang masü saka sen bilemba government doctor ali tashi Nagaland nung government mozü ki majungtsü. Atangji, private mozü kitema nüngdaker saka itemjibo government mozü kidang inyaker doctortem inyaksüba masü. Aji oda, private mozü kitem nungbo shiranger anepluba indang sen meshitsü saka government mozü kidangbo pei tenüng zülüokba dak alaka angati anepalutsü. Iba jagi sensakertema melamelaa taneptsü bushiteter aser ibajiang government ka teinyaksü. Aji oda, private nung inyaknüra government mapa toktsütsüla saka anaprongla nung inyakbajibo aneptsütsü bilema masü sen bushiba nung ozüng alema inyaker nisung ka lir ta sayur. Item doctor anemajibo senso kati okadak ken o a agütsütettsü.

OLEMSABANG

Sorkar aser Arogo "Service Rules" medemdangba (Research findings)

A. M. TOSHI JAMIR (Dimapur)
Retired DIRECTOR (GoN)

Asen lima nung Sorkar aser Arogo tesendaktep junga lir. Arogo-i Sorkar inyakyim tajung kar toklang tenzükertem asoshi reprangzüka amshia arudagi. Sorkar aser Arogo nung toklang tenzükertem atema Service Rules akatsü kanga nungdak. Ao Oshi nung, lim Arogotem ajaki amshitet-tsüsa (to use uniformly) Service Rule (oshi) ya meyipzüka amshi nung junger ta bilemer. Arogotemi Service Rule kaket cover nung yamaisa ajenloker amshiba angur: SERVICE RULE; SERVICE RULES; AROGO TENZÜKTSÜ TELATET; TOKLANGA TENZÜKERTEM TELATET OZÜNG; TENZÜKBA TEMZÜNG-OZÜNG; TENZÜKERTEM SERVICE RULE; AROGO SERVICE RULES (aser ano danga).

Service Rule nung kechisa densema alitsüla itemji tali rajema angatettsü asoshi yangi English Oshi nung agütsür: "Service Rules encompass the guidelines and regulations governing the conduct and responsibilities of individuals within an organization, particularly in government or professional settings. They often include provisions related to ethical conduct, discipline, leave and other aspects of employment". Anungji Sorkar aser Arogo nung toklang tenzüker tem atema Service Rules ayutsübaji kanga nungdak. AROGO LENIBA kaket (GUIDELINE) aser Arogo SERVICE RULE ji balala lemsar (Heading balala agütsür), amshira (amshia malir Arogo temi) ibaji tabensaba asütsü südi. (That is, booklet may be one but under respective Headings consisting of two parts).

NAGALAND STATE: 01.12.1963 küm State aküm. 31.03.1964 küm Sorkar mapa inyaktertem nütsüng 8311 liasü. Idangjibo Department 13 (thirteen) dang liasü. (Source: Statistical Handbook of Nagaland, 1965). Küm 60 (roger) sülen 31.03.2024 anogo nung züngdangba, Sorkar mapa inyaktertem joko 1,26,586 renloker liasü. Tetsür 34,160 aser tebur 92,422. Department züngdang nung 86 (eighty six) lapoker liasü. (Source: S.H.BK-2024). Sorkar nütsüng renlokba kuli tongtipangbaka ji ibai lir: District ka nungi tenzüka 1957 küm district asem aküm (Kohima, Mokokchung aser Tuensang) aser office tapu balala-tem lapokyonga ao. District asem nungjagi iba amai techanu mepuyonga ao: Kohima district nungi item districts razüka ao (Phek, Dimapur, Peren, Tseminyu, Meluri, Niuland, Chümoukedima). Mokokchung district nungi Wokha aser Zunheboto razüka ao. Tuensang district nungi Mon, Longleng, Kiphire, Noklak, Shamator razüka ao. District 17 prongla ya acha-ayangtsü asoshi Sorkar Office tapu balala aika lapokyonga ao. Iba amaji asen lima nung Arogotem nunga toklang tenzükertem (Ministry Staff aser Ministerial Staff) aika kümogo (Mungdang-temi item record tejangja Office nung up-date süa ayutsü nungdak).

Sorkar kübok Department shia Service Rules (Govt-i approved ser) yanglua lir. Lim Arogo-tem nunga Service Rules ya Arogotem shia-i yanglur amshir. Tatsüba agi, itemya Arogo shia INTI senden ajanga lemteter agizüka amshir.

Temalen Service Rules ratet nung shia aliba nungji ajemdaker Sorkar-i aser Arogo-i toklang tenzükertem azüoktsü/ketdangsutsu (aser ano danga nungdak) atema yangluba Rule kar ngua arudagi. State Sorkar tenzüker (appointed by State Govt) tem ajak ozüng (Rules) kati küsa alener. Tatishitsü agi, THE NAGALAND GOVERNMENT SERVICE CONDUCT RULES, 1968; THE NAGALAND SERVICES (DISCIPLINE AND APPEAL) RULES, 1967. Densa den putepa itemya yanglushia arudagi.

Temalen zülua aliba, THE NAGALAND GOVERNMENT SERVICE CONDUCT RULES, 1968, kaket nung tongtipang rongnung ka shisemer: "EVERY GOVERNMENT SERVANT SHALL AT ALL TIMES (i) MAINTAIN ABSOLUTE INTEGRITY, (ii) MAINTAIN DEVOTION TO DUTY, and (iii) DO NOTHING WHICH IS UNBECOMING OF A GOVERNMENT SERVANT."

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

California Harvest Crusade nung nisung 6,500-i Khrista agizük



California nung aliba Angel Stadium nung ayongzükba Harvest Crusade nung Pastor Greg Laurie-i Khrista nem taküm bendanga agütsürtem asoshi sarasademtsüdang tangokba noksa nung angur.

July 23, 2025: Honibar aonung Anaheim, California nung aliba Angel Stadium nung ayongzükba Harvest Crusade nung nisung 45,000 dak tali aden aser nisung 6,500 dak temai Khrista nem taküm bendanga agütsü.

Online ajanga iba sentong nung adenertema 200,000 dak tali liasü aser US tesem ajaklen radio stations 500 nung iba sentong live broadcast süa liasü.

July 19 nü ayongzükba sentong nung pastor Greg Laurie-i sayutsüngi aser Khristan osangtajung kentenertem- Cody Carnes, Kari Jobe Carnes, Chris Tomlin, Brooke Ligertwood, aser We The Kingdom-i shilem

agia liasü.

Harvest Crusade ya küm 35 tejaklen tenzükba sülen tang tesüsa agiba sentong nung nisung 6,500 dak temai Khrista agizükba ya otsü tasen ka lir.

Pastor Laurie-i social media ajanga, "Iba Harvest Crusades ya onok indang puti otsü nung sentong tajungtiba ka südakjang, ta onoki sarasadema aruogo. Tsüngremi onoki meshiba dang nungi tali inyakogo," ta metetdaksü.

Harvest Crusades ya 1980s tatembanglen tenzüka liasü. Parnoki iba sentong ayongzüka agitsü atema local Arogotem aika ayongsemer.

Tesüiba kümtem nung Los Angeles nung aliba Dodger Stadium aser Texas nung aliba

AT&T Stadium densema Canada, Australia aser New Zealand nung aliba yimti aika nung ayongzüka Harvest Crusade sentongtem nung nisung aika denogo.

Greg Laurie ya Harvest Christian Fellowship nung senior pastor lir. Mezüngbo iba ya Bible study tilaka ama dang tenzüka liasü saka tangbo iba Arogo nung züngsem 15,000 dak tema lir.

Taoba Honibar aonung Anaheim Stadium nung ayongzükba sentong nung Laurie-i sayutsüngiba sülen Khrista dangi arutsü tayongzükba agütsü; ajioda nisung 6500 dak temai sabangleni arua Khrista nem taküm bendanga agütsü.

Syria nung Evangelical pastor ka densema par kinünger ajak tepset

July 23, 2025: Taoba hopta tatembanglen Syria nung Evangelical pastor ka densema par kinünger 20 shi tepsetogo, ta Arogo nung lenirtemi metetdaksü.

Asürtem rongnung pastor, Khalid Mezher'e tsüraburtem, adianutem, chirnurtem aser kinüngertem aika densema liasü.

Khalid Mezher ya Suwayda nung aliba Good Shepherd Evangelical Church nung pastor teinyakdak liasü. Tamalenbo pa Druze tamanger ka liasü, ajisüaka küm aika tejaklen pa den par kibongi Khristan yimsü agizük.

Suwayda nung tensa tamajungba dang akümyonga pai iba yimti toktsür mao.

Suwayda nung Bedouin aser Druze telungpurtem tsüngda raraba mapang nung pastor den par kinüngertem asü.

Tesüiba hopta ka tsüngda iba tesem nung nisung 250 dak tali

süogo.

Bosra, Hauran, Jabal al-Arab aser Golan nung Archdiocese-i sangdong ka ajanga iba tatalokba sashia aitsüogo.

Archdiocese-isa rara nokdangtsü atema inyakdaksüner aser takoksa angurtem yaridaksüner, ta mepishiogo.

Suwayda nung tesüiba anogo 10 tashi chiyungtsü, tzü tajemtsü, electricity aser internet mali nüburtem kanga timtemdar.

Arab nunger pastor kati, tang Suwayda nung aliba Arogo züngsemtem jenshiogo aser parnok aika kong aliar memetet, ta metetdaksü.

US-i tiyongtsüi ia inyakba ajanga southern Syria nung rara anena lir, ajisüaka telok tila tsüngda rarababo manener.

Good Shepherd Evangelical Church nung pastor Mezher-i par Arogo nung züngsemtem

dang masü saka yimti nung aiba nüburtema kanga junga tenzüka liasü.

US nung Evangelical lenir aser Gaza Humanitarian Foundation executive director, Johnnie Moore-i X ajanga, Mezher ya pa tamang jenjang ajanga asü, ta metetdaksü.

Moore-isa, "Mezher'er kibong rangbeni kiyongertem aser Syria nungertem den Yisu temeim lemsateptsü atema pei taküm bendanga agütsü," ta metetdaksü.

Amongnü Syrian Orthodox Church-i United Nations aser International agencies dang kiralongrartemi timtem agütsüba nokdangtsü atema inyakdaksüner, ta mepishi.

Arogoisa Khristantem dang Syria atema sarasademjang, ta mepishi.

Tang rara nung Syria nunger Khristantem aser Druze nungertem densema minorities 1,000 dak tali tepsetogo.

ANOGO ABEN TSÜNGREM DEN

Lenisüba tanela

“Ochi Tanelai nenok ajak ochiba dangi anitsü.” Yohan 16:13

Tanabuba tangatetba tanelaji, Tanela Temeshi Kibuba Yisui Tanela Temeshiji asenok Teyarir aser Lenir ta metetdaksü. Pai asenok ochiba dangi anitsü. (Yn. 16:13).

Tanela Temeshiji tamanger shia dak alir aser tzüra temdaksür. Kodang tesayuba Tsüngrem nungi mesülir idakji jangratem aser tipdem ka malitsü. Iba indang tenyar Yohani tejangja ashi. “Shirnoki nenok mashileni anisar, parnok indang ni item o nenok dangi züluogo. Pa nungi nenoki kechi mezüja shimtetba angu, aji nenok dak alinung, kari nenok dang sayutsü, aji nenok tenüngdaksü maka. Saka Pai mezüja shimtetba jagi kechisarena indang nenok dang sayu nung, aser aji ochi asünung, tiyazü masü, aser aji agi nenok dang koda sayu, aji oda nenok dak liang” (1 Yn. 2:26,27). Iba osang yagi arogo nung tamangertem aintsü sayuba indang mashir (Ef. 4:11-13). Saka arogo nung tiyazü tesayurtem, shirnoki na ashioktsütsü meranger parnok indang jembir.

Tanela Temeshi asenok nem tiyazü tesayuba anema tekümdangtsü agütsür (1 Tim. 4:1). Tamanger kari tiyazü tesayuba kar mesüra jungkai adokba kar Khristan telok nung amshitsü merangdir pai Tanela Temeshi jashidaksüra! Pai “tatok makaba temenen” menar! Iba yagi Lucifer nem masadangtetba maongka agütsür. Tanela Temeshiji ochi tanela, anungji tiyazü tesayuba agi pa peladaksütsü makok.

Pauli 1 Tesalonikia 5:19-22 nung Tanela remsepdaksüba mapa asem sayur.

- 1) Sayutsüngiba mezüngmeshi masütsü
- 2) Ajak tendanger tajungba ametang
- 3) Tamajung kechisarena nung pilaa liang.

Tesalonika arogo nung Grik nunger süngyanglu külemba yimya tesayuba kar lir ta Pauli putet (Tesa. 3:5). Junga mangateti sayutsüngiba ajanga Asentenshi sayutsüngidang sayutsüngiri mezüngbuba onük nungji aibelener.

Metendangi agizükba aser tamajung nungi pilaa maliba jagi ajemaluba Tsüngrem Tanela tali jashidaksüra, aser asenok dak aliba Tanelaji remsemdaksür, tangar tanelatem ajak sakdaksür. Tanela Temeshi-i ola matoki tangar tanelatem inyakba ajia dangbo malitsü. Pa tenük meyiba Tanela lir!

Tanela Temeshi arung, kechiaser Na ajanga ainkartemi zülü aser jembi, ochiji lapokang, Na sapi lir, Temeshi Kaketji lapokang! (Charles Wesley, 1707-1788).

Plateau state nung Khristan 32 tepset

July 23, 2025: Nigeria nung Plateau state nung Tahoss district kübok Jebu yimdak Fulani teloki Khristan 32 tepsetogo, ta International Christian Concern (ICC)-i metetdaksü.

July 14 anepdang 3:00 ako meta Fulani Muslim nungertemi Khristan nütsüng teimba aliba yim amakdang ita asem kinü tanur ka densema Khristan 32 tepset.

Fulani telok jagisa ki aika rongdoktsüba den külemi alu raksatsü aser Tenla ki mitsü küma rongdongtsüogo, ta ICC-i metetdaksü.

Tenük kuli alirtemi ashiba agi, Fulani züngsemtem ket nungji prangpong aser nok liasü aser parnok tesem ajaklen nungi longbangba sülen injang khaloktsü.

Ezekiel Dung-i, "Tesem ajaklen nungi injang ola angashia onok saak. Kü den kinüngtsü aser ozü chirnur anabo tera agi dang kümzüik. Parnoki kidang mi senoktsü aser jena aoertem dak injang khaloktsü. Ozü kidangerbo kibong züngsem ajak süogo," ta metetdaksü.

Asürtemji aika maitsü-a mejangjatsüsa mi agi rongset.

Asürtem rongnung yimdak lanurtem lenir, Weng Dachung

densema liasü. Weng-ibo lanurtem ayongdena kiojenji mi nungi kümzüksü meranga liasü. Yimdak sepai ka duty nung liasü, ajisüaka pai item tatalokba nokdangtsü atema kecha meinyaki repranga dang liasü.

Iba tatalokba sülen ghonda ishika lir Plateau State Governor, Caleb Manasseh Mutfwang-i Jebu yim semdanga takoksa asadang aser mangyimertem melung sünepja liasü.

Governor-i, "Iba ya asalentong yanglur tai maket nisungtem tepsetba lir. Sorkari aibelenertem nem temerenshi agütsütsü aser yimtsüng tanaben yangerba maparen nung yaritsü," ta metetdaksü.

Jebu yimdak Tenla kidang Khristantem tekülem agiba dang masü saka yimdaklirtem senden-a agia liasü. Fulani teloki iba Tenla kijia rongdoktsüogo.

Iba Arogo nung pastor, Rev. Musa D. Alamba-i, "Ozü Arogo züngsemtem samaba dang masü saka Tenla ki aser ni akaba ajak samaogo. Ni Nigeria sorkar dang onok yaritsü mepishir. Onoki chiyungtsü, süoshi aser tejenokdak nüngdaker," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**


Tir Yimyim

Terongdong

(n) temang tesülen tekongnem o teperem na tsüingda (back)
 * Akhi chubatembo kor terongdong nung dang mener jaja.

Teropet

(adj) totzü nung junga merotet (not fried well)
 * Kidang teropet chiyongsü ajak azü nem agütsür.

OLONG PAITEP # 7217**TIPIEN**

1. Süngmang - 6
3. Tajü kümdaktsü - 3
5. Jangnem agizükba oset - 3
6. Telok tulu - 5
8. Chiok - 4
10. Tilateri - 7
13. Renloka ao - 4
14. Atem - 5
16. Mapang matong - 3
17. Mebilemtet - 3
18. Nisung aika senzü - 6

LANGTSÜNGLEN

1. Khu aben - 6
2. Arang - 3
4. Yimya yimko - 5
7. _ _ _ _ tep - 5
8. Ku ongtok - 5
9. Mesüktep - 3
11. Mesak/rürü - 6
12. Mapa atem - 5
15. Sentilong - 3

OLONG PAITEP # 7216 TELANGZÜBA**TIPIEN :**

1. Soro, 3. Yasüng, 6. Onü,
7. Semlok, 8. Tambusa, 12. Molumi,
13. Ako, 15. Tasoba, 16. Azük.

LANGTSÜNGLEN :

1. Sentsü, 2. Oktena, 3. Yimlibilema,
4. Sü, 5. Nunga, 9. Samesa,
10. Kumzuk, 11. Jakla, 14. Mo.

NAI-A YA METETTER MA

Nüngtugu kentener Ozzy Osbourne arishi küm 76buba nung süogo. Pa ya Black Sabbath indang frontman liasü aser British heavy metal icon ka lir. Ozzy indang tenüng ya John Michael Osbourne lir aser pa Aston, Birmingham nung 1948 küm aso. Hopta asemshi tejakdang pa tatembangbuba kentenba sentong ka nung shilem agiba sülen süogo. July 5 nü Osbourne ya 2005 küm sülen tang mezüngbuba Black Sabbath indang original bandmate tem den longjemer "Back to the Beginning" sentong nung shilem agia liasü.

Tripura-i ozüing alema ganja tsünüba anema drone tem amshitsü

Agartala, Chiteni/July 23 (Agencies): Tripura Chief Minister Manik Saha-i Mongolbarnü ketdangsürtem dang state kübok tesem balala nung ganja tsünüba aliba putetyonga aotsü atema drone technology amshitsü tetuyuba agütsüogo.

Tripura Civil Secretariat nung Task Monitoring System

lepareprangshiba senden ka amemba mapang iba tetuyuba ya agüja liasü.

Senden nung departmental secretaries, director, district magistrate aser district ti prongla nungi superintendents of police tem densema ketdangsür tejentemi shilem agia liasü.

Senden nung o jembiba

mapang Chief Minister Saha-i, temzüng ozüing, public infrastructure, healthcare, education, power supply, aser Agartala yimti nung gari kanga nongtepba ken o densema ken o aika lepareprangshia liasü.

Paisa, nüburtemi police agizükba yimya ya melenshidaktsütsü nüngdakba lemsatepba den state yimtiba nung gari nongtepba tajemba kümdaktsütsü atema gari kiburtem ajak garage alitsüba ya mandatory kümdaktsütsü benokdang.

Paisa, Health Department dang oxygen plant aser ventilator tem kanga junga inyaksangshidaktsütsü tetuyuba agüja liasü.

Maneni Saha-i, department ajaki meranga inyakba atema tenüngsang agütsüba den nüburtem tebilemtsü bentettsütsü asoshi tali yakbaka inyaktsü ajungshia liasü.

Manipur nung küm 13 tain kaketshir ka aleseta sür lia ngutet

Imphal, Chiteni/July 23 (Agencies): Manipur nung Saiton Bazar anasa Lamjing Meira Maheikol School, boarding facility anasa arishi küm 13 tain kaketshir ka temulung malemtsüsa süngtong ka nung aletseta sür aliba ngutetogo. Tanobusang ya internally displaced person (IDP) ka liasü.

Iba tatalokba ya Manipur, Bishnupur district nung Phougakchao Ikhai Police Station kübok Mongolbarnü ataloka liasü.

Class VI nung zünga aliba tebur chanasang ya Phuritsabam Ningthem'er jabaso Phuritsabam Santosh ta jangjaogo, shiba dang Piktru ta

ajar. Pa ya Torbung Gram Panchayat, Bishnupur district kübok Phougakchao Ikhai Awang Leikai, Ward No. 1 nungi liasü.

Forensic Science Manipur Bishnupur team-i ken o asadangba sülen pa tasümgang ya Regional Institute of Medical Sciences (RIMS) mortuary-i benerogo. Police-i ashiba agi, Phougakchao Ikhai Police Station nung yimya mesüi asüba ken o ka benokogo aser bushisüngdang tesüdak lir.

Kasa mapang nung pa asüba ya yimya mesüi asü ta temulung melemi bilema Joint Action Committee (JAC) ka tentetogo.

JAC convenor Kh. Jaya-i ashiba agi, Santosh ya yimya mesüi asü ta temulung melemi bilemer. Jongdak senden ka nung JAC-i bangzüng pongu agizükogo, kong ketdangsürtem dang anogo pongu tsüingda ochi temai adodkaktsütsü, school k e t d a n g s ü r t e m bushisüngdangtsü, Santosh asüba nung sendaka alirtem merenshitsü aser asür kinunger nem teyari tapet agütsütsü akhangba densema lir.

JAC-isa, July 26 nü tashi nung parnok takhangba mataloktsü tashi par kinungertemi Santosh tasümgang bener maotsü, ta metetdaktsü.

Assam nung kuli kaket taila amshiba atema nisung 2 apu

Guwahati, Chiteni/July 23 (Agencies): India nunger asür ka tenüng amshia Bangladesh nunger ka atema kuli kaket taila amshia India indang passport ka yanglutsütsü merangba atema Assam kübok Sribhumi district nung nisung ana puogo.

Aija alir ya Burhan Uddin aser Faizur Rahman na ta jangjaogo. Tenaprongla ya Patharkandi nung alir aser tang custody nung yua lir. Iba ita tetenzüklen passport application ka asadangba mapang

tashishitsü aliba rebrangetetba sülen tena ya apu.

Application ya Farooq Ahmed tenüng nung benoker liasü. Mezüngbo birth certificate, Aadhaar card, aser PAN card nunger ajak shitak ama rebrangetet, saka kanga junga asadangba sülen taila ta nguteta liasü. Ketdangsürtemi mapang tatsüka lir shitakba Farooq Ahmed ya süogo ta jangja aküm.

Police-i ashiba agi, Indian passport agizüka Bangladesh nunger ka India nunger ama

kümdaktsütsü tebilemba nung iba jenjang ya agia liasü.

Aija alisang ana ya apuba sülen meita aoba sentong ka benok aser iba mapang kuli kaket taila aika ngutetba den computer system ka ngutetogo, koba identification papers taila yanglutsü atema amshiba asütsü ta bilemer.

Aija alir anaprongla ya Chief Judicial Magistrate's Court-i anirogo. Ken o nung sorkar tenzükertema densema ali mali jangjatsü atema police-i bushisüngdangdar.

US-i Japan den trade deal ka yangluogo: Trump



Washington, Chiteni/July 23 (Agencies): US-i Japan den trade deal onsara tulu ka yangluogo ta Tir Donald Trump-i ashir.

Japan-i US nung sen \$550bn (£407bn) indoktsü mulungogo aser America nung par indang oset ayokba nung linük tonga arudang tax shilem 15 meshitsü - koba Trump-i shilem 25 meshitsü amokmerenba dang tajemba lir. Trump-i social media nung gari, trucks, jang aser alu nungi adokba oset kar densema US goods asoshi Japan-i par economy lapoktsü ta ashi.

Japan Ato Kilonser Shigeru Ishiba-ia iba sangdong pelashishia agizük aser US den trade surpluses aliba linüktem rongnung ibai tajemtiba alitsü ta ashi.

"Puti otsü nung trade deal tulutiba nung ni tangji meyongnem agütsüogo, aser

puti otsü nung Japan den deal tulutiba asütsü ta ni bilemer," ta Trump-i Mongulbar nikonddang White House sentong ka nung ashi.

"Parnok lenirtem yangi arua liasü, aser iba atema onoki kanga meranga aser mapang talangka inyak. Aser ibai ajak atema deal tajung lir. Ajak atema tajung asütsüla ta ni teti shia arur. Ibai deal tajung lir," ta pai ashi.

Bodhbarnü Ishiba-i ashiba agi, iba agreement ajanga gari aser gari oset nung US tariff shilem 25 aliba nung ajema shilem 15 asütsü.

Ajisüaka tax ya Trump-i Japan aser danga linük dang meshiba dang shilem 10 agi timba alitsü.

US-i Japan nungi oset bener aruba ya pezüsü nung shilem ka automotive sector nungi lir, koba par economy shilem 3 jungnüa alitsü.

2019 küm automotive shipments ya sen \$410bn (£300bn) jenjang liasü ta US International Trade Administration ajanga ashir.

"Quantity restrictions kecha makai alima nung gari aser auto parts nung tariffs ajemba onok mezüngbuba lir," ta Ishiba-i ashi.

UK nungi US dangi yokba gari tem America tzükum atongdang tax shilem 10 meshir saka vehicle quota ya 100,000 dang lir.

"Iba agreement nungya Japan nunger tsütsü nungi tariffs ajemtsüba indang kecha inoka mali," ta Ishiba-isa ashi.

Ajisüaka US gari yanglurtem iba deal nung mepelar, kechiaser Japan nungi bener aruba nung tariffs ajemer saka Canada aser Mexico nung parnok indang plants aser suppliers nungi bener aruba nungba taxes shilem 25 meshir.

Ford, General Motors aser Stellantis lokteper tentetba telok, American Automotive Policy Council tir Matt Blunt-i Japan tezüngzüktep ya majung ta ashi.

US-isa Philippines den trade agreements yangluba sangdonga liasü. Philippines nungi bener aruba osettem America atongba sülen tax shilem 19 meshitsü.

TENÜNGSANG AGÜTSÜR

Lt. Martemjen Jamir aser Wt. Moayongla Longkumer na jabaso Sapang Tialiba Jamir NSSB tatitang nung LDA Cum Computer Assistant (District) under Department of works & Housing (NPWD) jenjang ngutetba asoshi kidongi tenüngsang agütsür.

Tsüngremi ne taküm aser wadang maneni moajangma.

Sd/-

Longsa Lumong Kidong

Dimapur

ALI TAYOKTSÜ LIR

Seithekidema 'A' Dry Land.
@ Rs. 140 per Sq.ft.
Negotiable 30,000 Sq.ft.
Ph: 8974571416 / 8798119488

ALI TAYOKTSÜ LIR

At Naga United Village - Dry Land
@ Rs. 380 Per Sq.ft. (100 x 100 / 100 x 80)
Approach Road touch
Ph: 8798119488 / 8974571416

Malaysia PM-i nübur nem sen lema agütsütsü sangdong

Kuala Lumpur, Chiteni/July 23 (Agencies): Anogoshi nüngdakba osettsüset balala nung jenjang ajemdaktsütsü nükjidadong nung Malaysia Ato Kilonser Anwar Ibrahim-i package ka sangdongba nung senso teintet ajunga nem sen 100 ringgit (\$24) agütsütsüba dena lir.

Bodhbarnü television ajanga jembidang, iba teyari yagi Malaysia nunger nisung million 22 ajangzüktsü aser ibai August

31 nungi December 31 tashi stores 4,000 dak tema nung amshitettsü, ta Anwar-i ashi.

Sorkar-i subsidised petrol liter (2.6 gallons) nung sen 2.05 ringgit meshia aliba ajemer sen 1.99 ringgit meshitsü aser highways 10 nung toll rates timba akumtsü sentong aliba ajemtsü, ta Anwar-i ashi.

Malaysian Day den külemi taküm September 15 asoshi public holiday tali agütsütsü sentong lir, ta pai ashi.

"Malaysian kibong, talisa makamaiter temi iba teyari pela agizüktsü," ta Sunway University, Kuala Lumpur nung economics professor Yeah Kim Leng-i osangbener dang ashi.

Iba mera ya sorkari rongsenketzüing indaktsütsü merangba nung lirumedema lir, koba 2025 indang first half nung shilem 4.4 aser second half nung shilem 3.5 alitsü takzür, ta Oversea-China Banking Corp nung senior economist Lavanya Venkateswaran-i ashi.

"Tanü sangdongba fiscal package aser July ita tetenzüklen central bank ajanga 25bps rate cut sangdonga aliba ajanga counter-cyclical policies mera tali agiba sayur," ta Venkateswaran-i ashi.

Sen amoktsüba ajanga kibong nung achi-ajemba nung terabo yaritsü aser gross domestic product shilem 0.1 kongshitsü, ta Venkateswaran-i ashi.

Nüburtem anogoshi nüngdakba oset nung jenjang tali akumba aser Anwar-i temelenshi nangzükba mapa kuma meinyakba mechi pa mapa nungi anentsü khanga Kuala Lumpur nung rally ayongzüktsü anogo ishika lia pai iba osang ya sangdonger.

Opposition Perikatan Nasional coalition ajanga Honibarnü longkak aittsü ayongzüka aliba nungya nisung 15,000 shi adentsü imlar ta police temi ashir.

Israel den raratsü renema lir, nuclear sentong manentsü: Iran Tir

Tehran, Chiteni/July 23 (Agencies): Iran Tir Masoud Pezeshkian-i Israel den rara mashi raratsü par linük renema lir aser linük ana tsüngta ceasefire atema teimla kangabo mali ta ashi aser yimjung asoshi nuclear sentong maneni alitsü Tehran temulungtetba nung lir ta ashi.

Pezeshkian-i Al Jazeera den sensaksemba ya Bodhbarnü sayua liasü, koba taoba ita Israel den anogo 12 raraba tembanger yimjak nung anguba mezüngbuba alitsü. Iba rara nung Israel tenüing nung United States teka sangshia Iran indang nuclear facilities amak.

Iran indang nuclear facilities maka raksatsüba ya Washington-i ashiba dang nungi kanga tajemba lir ta osangtem prokshir aser Western linük temi Iran indang nuclear mangdang atema tangatettep kati arutsü bushir ta ashiba mapang ka nung pai iba o ya ashi.

"Israel mitkari mera tasen aginungbo onok jungjunga renema lir, aser ozü armed forces temi ano maneni Israel linük telung nung amaktsü renema lir," ta Pezeshkian-i Al Jazeera dang ashi.

Anogo 12 rara aliba temdaktsüba ceasefire nung Iran metaloka alir masü, ta pai ashi. "Iba atema onoki teimla kangabo mayur," ta Pezeshkian-i ashi.

"Iba yongji tensa mashi

atema aser telangzüba mashi agütsütsü atema onok renema lir. Israel-i onok yirutsü, aser onokia parnok yirutsü. Parnoki kanga sashia amak aser onokia linük telung nung sashia amak, saka parnok item takoksa miimshir."

Israel-i amakba ya, koba ajanga mitkar lenir aser nuclear scientists tepset aser nuclear facilities raksatsü, Iran indang hierarchy samatsütsü merang saka khenyongi yamaji meinyaktet, ta pai ashi.

Iran nung nisung 900 dak tema asü, aser parnok timba civilian tem liasü aser Israel nunga nisung 28 shi tepseter lia June 24 nü ceasefire tenzüik.

Linük balalai memulungaka Iran-i uranium enrichment programme manentsü aser iba nuclear abilities ya international laws indang framework kübok inyaktsü, ta Pezeshkian-i ashi.

"[US Tir Donald] Trump-ia Iran ket nung nuclear nok-nü malitsüla ta ashir aser onokia aji agizüker, kechiaser onoki nuclear nok-nü magizüker aser ozü yimten, tamangba yimsü, humanitarian aser strategic position aji lir," ta pai ashi.

"Onoki yimya tajunglen agi jembishinüba nung amanger, anungji tarutsü nung jembishinü alitsüsa süra aji ajak asoshi tajangzük asütsüla aser onoki amokmeren aser ozüing agütsüba magizüktsü."

Ozü indang nuclear sentong

tembangogo ta Trump-i jembiba ya mangpo-mangyimer ka dang lir, ta pai ashi. "Ozü nuclear tashi ya facilities nung masü ozü scientists tekolok nung lir," ta pai ashi.

Pezeshkian-i ashiba ama Iran Foreign Minister Abbas Araghchi-ia US broadcaster Fox News den sensaksem akaba Hombarnü sayaba nunga Tehran-i kodanga uranium enrichment programme metoktsütsü saka par nuclear mangdang nung tangatettep kati arua jembishinütsü mulunga lir ta shia liasü.

Tehran nung June 15 nü Supreme National Security Council indang senden ka nung Israel-i pa tepsettsü merangba indanga Pezeshkian-i jembiba kong pa tera yirua liasü.

Pa tepsettsü merangba indang asüngdang dang, yimten okshia atsüngdoktsü mechi linük nung rongrong tulu adokdaktsütsü meranga mitkar lenirtem tepsetba sülen Israel commanders temi Iran yimten yimsüsür dak tenük yokba nung shilem ka liasü, ta pai ashi.

Ajisüaka iba sentong nung tamakok ajuru, ta pai ashi.

US-i Iranian nuclear facilities amakba sülen Tehran-i Qatar indang Al Udeid base nung amakba ya Qatar aser par nüburtem dak amakba masü ta pai nenshia ashi.

"Onok aser Qatar tsüngta tsükchitep mesüra tetoktepa

alitsü ta onoki tebilema mebilem," ta pai ashi aser Al Udeid amakba anogo Qatar indang Emir Sheikh Tamim bin Hamad Al Thani dangi call süa par jenjang rateta ashi, ta paisa shisem.

"Onoki State of Qatar amakba masü ozü linük nung bomb pokloktsüba America nunger indang base ka amakba lir aser Qatar aser par nübur tsütsü ozü tangatetba tajung dang lir ta ni jangja-jangja aser shidak ashir."

Hombarnü Araghchi-i ashiba agi, taoba ita amakba ajanga Iran indang enriched material nung koma kongshi ta Iran indang Atomic Energy Organization-i tang tashi asadangtar aser Tehran-i yakta International Atomic Energy Agency (IAEA) nem parnok bushitetba osang agütsütsü ta ashi.

Iran-i IAEA den amalitep akaba manen aser IAEA ajanga inspector tem Iran-i yoktsü asüngdangba kanga junga asadangtsü, ta ashi.

Iba agency den amalitep akaba khen asoshi anentsü atema ozüing ka nung Pezeshkian-i meyongnem agütsüba sülen IAEA inspectors tem ita tetenzüklen Iran yutsür ainshi.

Maneni Iran, France, Germany aser UK linüktem tsüngta Hokulbarnü Turkey nung jembishinü akatsü lir.

Sindhu, Satwik-Chirag round of 16-i iogo



CHINA OPEN SUPER 1000

Chiteni/July 23, 2025

(Agencies): Olympic nung medal ana ngur alila aser taoba mapang world champion PV Sindhu-i Bodhbarnü China Open Super 1000 asayamung tetsür kija asaya nung Japan tsür sixth seed asayar Tomoka Miyazaki 21-15, 8-21, 21-17 agi koka round of 16 tongtetogo.

Sindhu shiba tang world rankings nung 15buba nung lir, lai asaya kanga tashi ita tenzük aser mezüngbuba game nung point tenet atonga ngua la 13-5 agi tejakdang akümba sülen asaya koka liasü.

Ajisüaka tanabuba game

nungbo arishi küm 18 tain Miyazaki-i 8-3 agi tesülen aliba mapang point teku atonga ngua 12-8 agi la tejakdang aküm. Miyazaki, shibai taoba küm Swiss Open nung Sindhu koker liasü lai tanabuba game ya ayong ayonga koka liasü.

Decider nung Sindhu-i asendenshir asaya aser asaya tepeyong la tejakdang sür asayaba sülen asaya ya minute 62buba nung koka taoba mapang tamakok anguba mangyangogo.

Tebur tarep asaya nung world No. 15 tarep Satwiksairaj Rankireddy aser Chirag Shetty natia asayamung kanga junga tenzük Japan nung tarap

Kenya Mitsuhashi aser Hiroki Okamura na 21-13, 21-9 agi minute 31 nung koka liasü.

Taoba mapang world No. 1 tarep ya tajungba asayayonga aotsü merangtsü imlar, kechiyong tena taküm Malaysia Open, India Open aser Singapore Open ta asayamung asem tashi nung semi-final majangteti tsükogo.

Kasa asayamung nung India tsür tarep asayar Rutaparna Panda aser Swetaparna Panda nabo mezüngbuba round nung tsükatokogo. Tena ya Hong Kong tsür Nga Ting Yeung Yeung aser Pui Lam Yeung nati 12-21, 13-21 agi ayong ayonga koka liasü.

Shreyasi-i Roller Skating nung gold medal ngua otsü tasen yanglu

Chiteni/July 23, 2025

(Agencies): South Korea nung tang asaya aliba Asian Roller Skating Championships nung India tsür rongnungi skater Shreyasi Joshi-i Inline Freestyle-Classic Slalom category nung gold medal ngua otsü tasen ka yangluogo.

National Championship 10 ben koker alila Shreyasi-i Korea nung takok anguba sülen la ya Asian title ka abenba mezüngbuba India nung asayar kümogo.

Shreyasi ya Pune nung aso aser la arishi küm asem asüandang nungi teyi Swarali den skating asaya liasü. Arishi küm trok ajungba mapa tashi nungbo tenati national asayamungtem nung medal tem ngua liasü.

Ina atuba mapang Shreyasi ya speed slalom aser classic slalom nung mongin aküm. Laisa, freestyle inline skating kanga junga asayateter.

La ya national jenjang nung asayar tajung ka aküm aser arishi küm tasazük balala category tem amokbanger

asayaba sülen senior tetsür category nung asaya tenzük.

2021 küm December ita Mohali nung 59buba National Roller Skating Championship nung Shreyasi-i senior girls' category nung Speed Slalom aser Classic Slalom naprongla nung gold medal angu.

Iba sülen 2024 küm Bengaluru nung 62buba National Roller Skating Championship asayaba mapang lai ano speed slalom aser classic slalom na nung gold medal ngua liasü.

Maneni Shreyasi arishi küm 12 dang asüba mapang 2017 küm Nanjing, China nung World Roller Games nung India tenung nung oa asaya aser freestyle aser speed slalom event nung shilem agia liasü. La freestyle slalom nung 20buba aser speed slalom nung 22buba nung tembanga liasü.

Shreyasi Joshi ya arishi küm 21 dang lir saka lai national aser international jenjang nung takok tajung aika ngutetogo aser ano maneni nguyonga aotsü timla lir.

Russell international cricket asaya nungi anisüngzüker

Chiteni/July 23, 2025

(Agencies): Andre Russell Mongolbarnü West Indies team nungi tatembangbuba asaya asayaogo. Pa tatemsa Sabina Park nung Australia den linük tenung nungi T20 asaya ka nung asayaogo, ajisüaka parnoki takokbo mongutet.

Australia den T20I asaya pongu asayatsü aliba mezüngbuba ana nung asayaba sülen pa asaya nungi anentsü ta sangdonger liasü. Pa asoshi West Indies nungi tatembangbuba asaya nung par team-i asayar 5 out sür run 98 yanglur aliba mapang pa batting ameni ai aser pai ball 15 nungi run 36 yanglua liasü.

"Asaya result onoki aginüba amabo masü saka kidang asayatetba atema

pelar. Sabina Park nung ni pusemba ya kü atema kanga tongtibang lir," ta Russell-i ashi.

Arishi küm 37 tain asayar ya continent ajak amai nung professional cricket asayaogo aser pa tang international asaya nungi anener asaya mapang franchise cricket dak rangloker asayatsü merangdar. Franchise cricket nung pa ya ajaki aginüba all-rounder ka lir.

Linük team nungi asayaba mapang Russell-i T20 World Cup (2012 aser 2016) ana kokogo. Pai WI team nungi T20 asaya 86 nung asaya aser iba mapang run 1122 yanglu aser wicket 61 agia liasü.

"Ni tanur asüandang idaki asayatsü pungmanga liasü. Ni tang asaya tokja lanur

asayartem nem maangka agütsütsü mapang tongogo. Team nung Shephard, Ruth-erford, Alzarri, Holder nung amala sempet aketba asayartem lir," ta pai ashi.

WI jersey semer tatembangbuba asayai adokba mapang par teammate aser opponent temai pa nem guard of honour ka agüja liasü.

Russell international cricket asaya nungi anenaka pa mazüangi dang asayatsü. IPL den pa Major League Cricket (MLC) nunga marquee asayar ka asütsü imlar aser iba den UAE indang ILT20 aser Caribbean Premier League nunga asayatsü.

"Nenoki ni nongita yariba atema kanga pelar," ta pai fan tem dang ashi.

AS Roma-i Ferguson loan nung anirogo

Chiteni/July 23, 2025

(Agencies): Seria A club AS Roma-i, Premier League club Brighton and Hove Albion nungi Ireland nung forward Evan Ferguson Bodhbarnü loan nung anirogo, aser pa teti atema alizüksü asoshi lenmang sadema lapoka yuogo.

Arishi küm 20 tain Ferguson shiba 2024/25 season tesadang ka West Ham-i loan nung oa asaya liasü, pa Italy yimtiba nung career yanglushitsü merangtsü.

Ferguson ya St. Kevin's Boys aser Bohemians academies nungi anitetba asayar ka lir, aser pa 2019 küm mezüngbuba senior team nungi asayaba sülen 2021 küm Brighton-i anir ao.

Brighton head coach Fabian Hurzeler-i, Ferguson tarutsü takok nung aotsü aser Roma nungi asayaba mapang kanga junga arantgetshitsü imlaja ataba lemsatep.

"Taoba season ka ser tesadang Evan atema kanga tasak liasü aser yiruba ajanga



asaya nung tetsükdaktsü aika adokogo," ta Hurzeler-i ashi.

"Pa taneptsü nguogo aser kanga tashi ita meyipa aruogo. Tang pa asaya ajak nung asayaner. Iba ya maangka tajung ka aser league tashi tait ka lir," ta pai shisem.

Roma-isa, arishi küm 16 tain forward Antonio Arena Italian football third tier club Pescara nungi alizükogo.

Roma pur Serie A nung 2024/25 season pongububa nung tembang liasü. Parnoki asaya 38 nung point 69 angu aser iba ajanga UEFA Europa League nung asayatsü maangka ngutetogo.



Seongnam Open International Championship, South Korea nung Nagaland Taekwondo team nungi gold medal angurtem aser ketdangsürtem July 23 nü Dimapur airport tonga Aruba mapang Kezhaleü Keretsu aser Kezhakielie Yhome, Joint General Manager of the Airport Authority of India nati agizüba noksa nung angur.

BILEMDANGANG

"Tamajung bilemra tamajung dang adoktsü."